

四庫全書

集部

欽定四庫全書

集部

初寮集卷五

詳校官庶吉士臣張溥

侍讀臣孫球履勘

謄錄舉人臣李憲喬

欽定四庫全書

初寮集卷五

宋 王安中 撰

表

賀正旦朔御大慶殿朝會表

臣某言一統肇端方憲始和之象九賓就列肆臨御辨
之朝動植均和旄倪胥悅中賀恭惟皇帝陛下堯功同
大湯德俱新履帝位而光明觀天下以中正盛陳儀於
歲首邁漢七年謹圖事於春朝罄周六服維祺有永俾

熾無疆臣猥備方宣預欣邦慶雖切獸樽之悵莫陪龍
闕之趨臣無任

天寧節賀表

臣某言帝乘六氣冬律應而萬寶成天佑四方聖人出
而羣生遂中賀恭惟皇帝陛下道彌三極仁暢八埏九
叙作歌既錫非常之瑞百神爾主用開多歷之年誕先
星電之辰增衍乾坤之策臣限縻方任阻造路朝念昔
稱觴夢猶聞於鈞奏迨今護塞心獨效於嵩呼

又

臣某言律中應鍾寔始誕彌之月星流華渚有開長發之祥凡在照臨率惟忭蹈中賀恭惟皇帝陛下道兼覆載功軼平成雲漢昭回煥若文章之懿雷風鼓舞赫然政令之新孝弟通於神明制作侔於造化益五帝其臣莫及自致重熙凡三代受命之符畢彰不應爰及生商之候肇先纘禹之休日中惟亨皇建其極王猶允塞聿臻四海之歸天德出寧更卜萬年之永臣曩陪拱極嘗

預稱觴遠護塞垣心坐馳於北闕阻登軒陞壽徒祝於南山

賀夏祭禮成表

臣某等言禮行泰時載嚴三歲之常道格柔祇永祚一人之慶見聞所逮呼舞攸均臣聞經所重者祭祀之倫辨莫大乎陰陽之位休矣皇考既陋合祛之非至哉坤元有開專配之盛嗣逢昌運蒐講上儀紀寧貺之休辰具臻殊應奉和陽之徽冊祇薦鴻名襲用彌文聿崇熙

事恭惟皇帝陛下道參高厚功極平成居焉龍見而雷
聲時乃天明而地察御六氣之辨無所不通接三神之
歡皆得而禮臣叨陪近列實預駿奔駿假無言幸陟再
成之陞昭茲來許敢稱萬壽之觴

賀瀘南再捷表

并笏
記

臣某等言王旅濯征采入其阻蠻方者定時靡有爭吉
語遠傳歡聲咸暨中賀竊以舜格有苗而敷文德七旬
舞于兩階周因玁狁而駕戎車一月至於三捷厥遭盛

旦更邁前聞師出渡瀘如動九天之上功成獻泮不淹
數日之間力既易於建瓴勢有同於破竹山林殘種弗
遘克奔脣輔遐陬不戰而屈實畝實籍方斥大於幅員
我泉我池永蕩除於巢穴恭惟皇帝陛下沈機先物獨
智如神恢下武之伐功極采薇之外治靈旗所指堅壘
自摧上帝臨而無貳無虞三事就而不留不處敷奏其
勇遂通道於要荒通駿有聲可告還於廟社臣幸叨榮
祿慚乏壯猷鼓愷樂以象成願上萬年之壽開明堂而

坐治益傾四表之心臣等無任

蠻衆憑陵天兵奮伐甫奏鷹揚之勇亟臻蟻聚之平恭
惟皇帝陛下聖武布昭神心經緯陳師鞠旅出成算於
中天折馘執俘震稜威於裔土外開禹績上廣文聲以
矢其音式集四方之賀無思不服敢揚萬壽之休

笏記

賀湖北路奏捷表

臣某等言蠻寇憑陵天兵奮伐縱其羣醜殲厥渠魁捷
奏遠傳歡聲咸暨中賀竊以溪獠匪茹屢干紀而不除

邊吏苟安或弛兵而弗戒乃容嘯聚敢肆跳梁王旅嘽
嘽往專求於首惡虎臣矯矯茲亟奏於膚公遂訖兵誅
殆無噍類國威震疊八蠻知懼以寢謀地利并包百世
可因而無患恭惟皇帝陛下神心經緯聖武布昭出聖
算於中天申大刑於裔土赫赫濯濯遠收不陣之功蕩
蕩巍巍丕顯無前之績臣共叨榮渥親遇熙隆廣文之
聲願告成於廟社陟禹之迹更通道於要荒臣等無任

賀環慶路奏捷表

臣某等言黠羌潰走叛黨誅夷陳原野之大刑據山川
之利勢神祇助順海宇均歡中賀竊以兵義者王師直
為壯蠢彼負恩之小寇連茲干紀之外戎我用有征人
斯共憤果憑勝算大挫兇徒賊雛授首於軍交醜類枕
尸而山積籍其田畝守以金湯地包種落之膏腴天設
封圻之險固恭惟皇帝陛下懋昭剛德丕顯駿功惟斷
乃成爰舉萬全之役咸劉厥敵用申九伐之威方所向
之無前顧何求而弗獲臣叨聯輔拂竊預榮懷如雷如

霆莫助鷹揚之勇于疆于理即觀蟻聚之平臣等無任

賀瀘南奏捷表

臣某等言遠夷負固王用濯征我旅奏公天惟順助捷
音迅至歡頌交興中賀竊以舜格有苗蓋未忘於舞羽
周疆南海亦屢戒於戎車方隆道德之規坐繼詩書之
述夫何蟻聚輒肆狼心天討時行莫予敢侮皇威外震
弗迓克奔無爭將偃於師干有截更恢於輿地恭惟皇
帝陛下仁心溥博剛德布昭睿謀矯矯而神行聖武煌

煌而火烈申嚴九伐聳動八方乃觀厥成蓋有寧人之
指以戰則克共知上帝之臨臣親遇休辰共霑榮渥稱
觴黼座敢揚萬壽之休獻凱旌門益壯六軍之氣臣等
無任

賀三山新河行流表

臣某等言神機獨運得隨山濬川之方經瀆全回資造
舟為梁之利覆涵所暨呼舞惟均中賀竊以導河至于
大伾稽古有曰文命簡編尚矣形勢自然鬱層阜之可

疏曠前修之罕議會逢聖作動與道謀奮英斷於倅來
之初授成算於股引之際所助者順有開必先人皆勸
趨後亟告就歲絲蠲息可寬東郡淇園之憂天險長雄
豈特長坂盟津之固恭惟皇帝陛下德充三極政協九
疇天且弗違水無不下誕先登於岸迺推濟物之仁永
賴時乃功用播翕河之頌臣等共塵榮渥親覲休風無
有後艱當首四方之賀聿懷多福莫窮萬壽之期臣等
無任激切之至

賀河平表

臣某言一德享心皇天眷佑百神受職經濟安流荐書
大有之編永絕橫流之患盛超古昔驩動邇遐中賀臣
聞王正其道以理川水得其性則潤下同入于海禹勤
乃訖於中邦允猶翕河周盛用升於喬嶽會逢熙運効
見休符恭惟皇帝陛下智叙九疇政修六府是興神物
環泰鼎以奠方告厥成功執玄圭而端命尊禮后祇而
天明地察不壑鄰國而本固邦寧燕及渾波桃屢華而

弗溢循於正道薪不屬以非憂將觀軒后之馬圖共陋
漢成之年紀臣頃居起部預奉睿謨暨茲尹正之行親
覲懷柔之驗稱慶莫趨於北闕傾心但祝於南山臣無
任

奏賀乾寧軍黃河清表

臣某言率土底平丕顯無前之績澄瀾協應於昭滋至
之休凡屬照臨莫不鼓舞中賀竊以靈源五色符帝王
之作興曠世一清見古今之紀述雖曰流傳之不妥猶

疑閣絕而無聞事出非常理宜有待惟章聖之在御偉
大中之發祥聳動綿區焜耀方冊創業垂統傳休德於
無窮繼體守文格珍符之委至矧乾寧建壘之所當洪
河入海之衝會源委以來同宜休嘉之濬發克臻景貺
厥邁前芳恭惟皇帝陛下宅心唐虞比肩文武無一物
之失所致萬國之咸寧孝極奉先水皆潤下撓之不濁
湛千里之渾渾魏乎有成慶一人之穆穆臣叨持從橐
假守塞垣眷此殊禧見於屬部究觀前史允為千載之

逢遠迹大廷莫預四方之賀臣無任

賀隆德殿芝草表

臣某等言閼宇寧神靈芝薦瑞祚有邦之駿命垂永世
之徽音慶事系傳歡聲咸暨中賀竊以至誠能化有感
必通和氣致祥無幽弗屆緬懷碩媛嚴奉睟容王假有
家既厚追崇之禮天監在下用昭滋至之休煌煌三秀
之英奕奕二南之效恭惟皇帝陛下清心體道正德御
邦申禕衣揄翟之恩有關雎麟趾之應巍巍蕩蕩同帝

堯之無能名肅肅雖乃文王之所以聖是宜懿淑默
助嘉祥臣幸列近司無裨美化莫不好德益彰彤史之
光維以遂歌當陋齋房之作

賀宣和殿玉芝表

臣某等言德際乾端祥開帝所密依丹檻並秀瓊芝慶
集自中驩均無外中賀竊以元封有獲僻在甘泉之後
庭神爵所誇下侵函德之承雷詎覩靈華之雙吐適當
燕處之九重鍾協氣於堯階迎清光於舜目益監觀之

有赫曾咫尺之不違恭惟皇帝陛下體道象先玩心物
表撫四海以精神之運成萬化於蠖濩之中仁恩雨施
而雲行聖知金聲而玉振允宜嘉瑞近出邃嚴臣竊幸
逢辰共深戴后如天人使之無間罔有二三如山阜以
莫不興將延萬億

又賀中書省玉芝表

臣某等言聖政修和仰格上穹之睠靈芝挺秀俯當右
省之庭若見與聞或歌且嘏中賀竊以紫微邃宇清禁

近隅肇自先朝任專進稟嗣開盛旦名正弼諧凡立經
陳紀之大猷與繼志述事之美意登崇俊傑修講禮文
本睿訓之發中致治功之冠古坤輿薦祉神草告休密
抱附於菊枝瑩輪囷之玉色所臻若此其應不虛恭惟
皇帝陛下祇紹丕圖適追先烈撫萬邦而作又綜百志
以維熙后克聖不命其承自凝庶績天無親惟德是輔
用錫嘉祥臣叨列近嚴慚無調燮親覩晨華之異更紆
神筆之褒旅同穎之禾願比周書之歸美賦再榮之柳

竊嗤唐史之溢辭

賀五色雲表

臣某言神物應期方展大建之拜慶雲承日共知上帝之臨在列咸觀綿區溢喜中賀恭惟皇帝陛下緝熙大業應受珍符堯有成功而巍巍禹會羣后而濟濟石文前告已彰四字之奇天表相通更呈五色之瑞二儀並貺萬壽攸崇臣職限守藩心勤存闕竊幸休祥之雜還第歌雅頌之昭回臣無任

又

臣某等言俊德昭升上穹純祐大明久照卿霽相輝瑩
視所同歡聲咸暨中賀恭惟皇帝陛下中正履位文明
應天物蒙大澤之油油帝睠小心之翼翼慶雲在上絢
五采以爛然白日顯行彌四方而仰止占有太平之喜
冠諸可致之祥氣非霧而非烟福如幾而如式昔葩葉
告勝符於涿野若龜龍發歌詠於虞廷五帝殊時萬世
一遇臣共霑寵渥實與榮懷天聰天明方輔維馨之德

雲名雲紀願揚滋至之休臣等無任

賀開封府甘露表

臣某等言神都空圖本帝德之好生仁澤零庭見天心
之助順適契誕彌之月有開長發之祥中賀竊以刑措
者帝王之極功露降者天地之相合惟此四方之會坐
環千里之畿惠自上孚事皆中覆星流華渚當聖旦之
俯臨草鞠園扉屬嘉師之無犯積是和平之氣溢于大
衆之區乃霑雲表飴醴之滋在彼府居杞棘之上天難

愛道帝用與齡恭惟皇帝陛下聖治隆寬風化率籲商
邑翼翼首熙冬月之溫湯網恢恢盡解秋荼之密允宜
靈液來應昌期臣叨備四鄰敢稱萬壽垂恩儲祉詎須
漢掌之承翻潤流甘頗覺魏盤之隘臣等無任

賀太常寺甘露表

臣某等言容臺相禮仰承制作之功膏露効祥俯示顧
懷之意燾臨所既抃舞胥同中賀竊以在昔治時數霑
仁澤孝宣之神雀五鳳世祖之建武中元近但止于宮庭

遠或彌于郡國應誠而至惟帝其難眷直清惟寅之司
有盛大常存之義備太平之庶事兼咸秩于無文益盡
制盡倫作者謂之聖故如飴如醴莫之令而均恭惟皇
帝陛下孝極繼承道該損益是正百王之陋若稽三代
之隆穆穆新儀神祇祖考樂此穰穰嘉瑞松柏竹葦受
之臣叨被寵榮並逢熙泰合天地之化欣已格于殊休
修山嶽之封願遂觀于曠典臣等無任

賀延福宮竹上甘露表

臣某言旻霄協氣應一德之馨香禁籞叢篁浥萬珠之
飴蜜系傳嘉慶胥集懽愉中賀竊以九重通紫太之神
衆產襲堪輿之粹如竹苞矣知本固而根深零露滑兮
示澤流而恩洽恭惟皇帝陛下體真順則凝命宅中物
咸昌于至仁帝永綏于多福天故不愛其道申降美祥
人莫之令而均共陶醲化臣方承優寄阻綴賀班洋洋
親聽于民聲栩栩獨尋于帝所臣無任

賀甘露翔鶴表

祠于齡鼎之宮有甘露降奏樂
致謝雙鶴飛翔于帝幄殿上

臣某言作樂告成先民時若制器尚象惟聖為能宜協
氣之橫流致嘉祥之並至中賀恭惟皇帝陛下高厚配
于天地孝悌通于神明凡文武齊聖以起治功皆緒餘
土苴以為天下厥有因革其盡精微貢九牧以昭神姦
珍符來寓方一變而致羽物邃古有稽共欣不世之逢
是為太平之象臣任叨紫塞阻陪鴈鷺之班目斷彤廷
徒結雲天之戀臣無任

賀帝鼎成表

臣某言鼎鼎告成肇稱緡禮冕旒受慶袞對鴻禧覆疇
所臨歡呼咸暨中賀竊以軒帝聿興三鼎是用大亨夏
后爰鑄九金以圖百物自禹而降莫得其真逮漢以來
烏覩其瑞天祚明德人與成能灼知一言之孚深發獨
智之蘊作新大器增重皇基睿謨俯授於工師神寶遂
隆於國鎮茲為能事夙邁前修恭惟皇帝陛下淵懿測
靈聖神用妙聲身中律度之數制作軼河洛之文繫象
具昭舉百王已墜之典規模特異承萬世無疆之休涓

擇令辰丕膺景貺龍文光潤本川嶽之效珍日景晏溫
宜天地之協應搢紳聳視海宇傾聞臣託備藩維阻趨
朝路歎周南之滯莫預盛儀存魏闕之心但勞昔夢

賀開封瑞應治效表

臣某等言邦畿是宅帝德攸施神降嘏而產祥諸福畢
至人遷善而遠罪比屋可封盛冠簡編慶均寰宇中賀
竊以惟民所止茲為衆大之區承王之休積有中和之
澤屬聖神之在御格上下以交孚於皇來牟誕降嘉種

膏露靈芝之紹應嘉瓜瑞木之駢生道不拾遺庭無留
訟桁楊弗用桴鼓稀聞節義出庸衆人之間閭里敦士
君子之行皆太平之象所宜有者故內史之地今多見
之恭惟皇帝陛下躬秩大猶懋昭來孝皇建其極既表
正於廢邦道兼于三乃和同于一氣無遠弗届永觀厥
成臣親遇隆熙幸塵榮渥若時百辟巍巍共仰於堯功
維爾四方翼翼更尊於商邑

賀開封府翔鶴表

臣某言陽月初吉肆臨履武之辰天府攸居載集鳴臯
之類嘉祥協應驪詠交騰中賀竊以夢上帝之與齡但
傳周室頌聖人而使壽不越華封未聞星虹將至之期
有來翔鶴難致之物翩翻仙馭呼舞神州厥數至于三
千之多其符若曰億萬之永恭惟皇帝陛下道彌覆載
功格平成躬既聖而不可知德為天之所大奉宛彼冲
飛之瑞昭茲眷顧之休翔觀象之門實導六龍之巡邁
臨首善之地又先四海之祝延臣驟遠清光頻聞慶事

莫預造庭之列但深存闕之誠臣無任

賀寶錄宮翔鶴表

臣某等言日馭天臨列霓裾之萬衆臯禽雲舞來金闕
之千尋凡逮見聞率同忭蹈中賀恭惟皇帝陛下研幾
物祖觀妙道樞躬既聖而不可知德為天之所大奉夙
膺帝訓崇護真風乃附紫垣肇新琳宇明馨玄酒通盼
鑾於叢霄寶劑靈符起呻吟于比屋異人間出上帝居
歆親屈至尊往陳廣會宜飈遊之降集驂羽鶴以徘徊

蓋高真衆妙之心眷于一德託久視長生之類介以萬年臣幸遇熙辰具叨榮渥自天祐也幸觀感格之誠其子和之敢急對揚之義臣無任

賀翔鶴竹木表

臣某言仙禽天降映雙闕以來翔練實秋登燕七閩而與足慶聞當寧歡浹綿區中賀竊以鶴鳴在陰非真靈之莫使竹粒如麥徒夙昔之有聞裴徊象魏之多衍溢倉箱之富聿彰殊祉允屬熙辰恭惟皇帝陛下體道窮

神虛心植德貫三儀而並貺妙一氣以同和於昭上帝
之臨屢來羽物克篤曾孫之慶既劬田功故端闡紛胎
化之羣而下土獲鳳餘之食用介無疆之萬壽示將不
改於四時臣職祕宸嚴任隆都會望堯雲而手舞伏魏
地以心馳臣無任

賀連理木表

臣某言清禁宅尊首泰和之一氣靈柯連理祚景命之
萬年喜動內朝觀均綿宇中賀竊以木曲直而中合有

開必先天聰明而下臨惟德是輔恭惟皇帝陛下道施
六府政順五辰省山獲大吉之符在沼薦駢華之祉偉
茲上瑞密當咫尺之天申以繁禧益永春秋之歲臣叨
榮宴舊賴慶特深伏魏地以心馳嚮堯雲而手舞臣無
任

賀朱草表

臣某等言天子能致之資上穹日監大德自然之應瑞
草時生祚景命以增隆紀信編而特煥慶歸當寧歡浹

綿區中賀竊以佑民而作君師施德而至草木則有異
卉宛如渥丹太清無為嘗偕甘露而薦祉上古至治迺
配嘉禾而効珍屬盛旦之開先冠衆祥而創見萍實相
輝而獨茂珊瑚枝對聳而更柔申錫中天告寢昌之炎運
聿來南土表麗正之離明惠我無疆臨下有赫恭惟皇
帝陛下道參化育功極平成帝既眷而省山神亦懷而
受職法星順軌暘日重輪咸曰休哉屋既流於赤羽和
之至也野復秀於朱萌泥金可驗於幽經染絳用華於

皇帝食斯不老占壽考之萬年炳且弗渝亘本支之百世臣共勤戴后每幸逢辰悉至於建固難名於聖妙並受其福徒有賴於邦榮臣等無任

賀河中府蟾蜍背生芝草表

臣某言聖神至化旁流龜雉之淵天地中區覩見蟾芝之瑞慶符興運歡浹羣情中賀竊以神草之生帝功攸大然附根磐石淮王或曰不能故連葉銅池漢代以為不貺歷攷簡篇之舊述未聞木肉之同和邦其永孚于

休天之所助者順乃因熙洽首效殊尤恭惟皇帝陛下
道貫二儀仁充四表虞氏之恩被動植既聽蕭韶之成
周王之德及昆蟲方來臺囿之樂干戈載戢壽考維祺
煌乎可致之祥具此非常之應臣限縻事守阻造班聯
聆福物之系傳同興人而率舞

賀平定軍白兔表

臣某等言仁施動物各得其宜免擾中林不浴而白慶
昭圖牒歡動幅員中賀竊以明視之生有難窮之三窟

褐衣者衆無不駁之一毛惟威折於陰幽與化馴於狙
詐無思不服覲德則純然後不角不牙秀出中山之族
自形自色皎同空谷之駒天方厚於休明地兼名於平
定厥祥有此其應可知恭惟皇帝陛下通妙羣生智明
庶慝克招携而懷遠乃用夏以變夷宜月魄之效奇示
帝心之助順德罔二三之所致豈諄諄然命之乎歲逾
五百而來思故皜皜不可尚已臣共逢昌運欣睹珍符
紀周宣舞鎬之年外攘復古按韓愈辨徐之說不戰來

戎臣等無任

賀白兔野蠶成繭表

臣某等言孕靈月魄玉色惟純薦祉桑田冰絲可織二
邦時奏萬宇均歡中賀竊以至德之光無遠弗屆諸福
之物厥類惟彰睠高密之近區獲明視之素質驗仙經
之壽則既滿五百歲占金行之祥則當服西南夷又茲
野繭之成豈但農疇之慶獻於良日用惟黻冕之共祀
及先蠶應在禕褕之助恭惟皇帝陛下道包衆甫化底

不平熏然一氣之和以作動物燕及八紘之廣豈曰無
衣宜登天產之珍昭示帝心之格中林肅肅乃創見於
神奇十畝閑閑初不勤於條采臣親逢熙洽竊預榮懷
賁然來思樂文王之在囿服之無數仰軒帝之垂裳臣
等無任

賀紅鹽表

臣某言天子躬能致之資邦風有赫火德示自然之應
池鹵凝紅曠古希聞羣生咸喜中賀竊以郇瑕之野濬

發利源祥符以來肇登瑞牒益地不愛其實則邦永孚
于休恭惟皇帝陛下孝奉神明功昭祖考天授之非人
力所欲弗違祥多者其國安於斯為盛臣猥司宮鑰阻
造闕廷第歌災運之隆莫對清光之近臣無任

賀石中有明字表

臣某等言造基重屋乃天人合應之期伐石他山有日
月相推之象光超前載歡洽羣情中賀竊以物有悍堅
蓋不誠未能動者帝將啓佑則以行與事示之惟陽館

之肇營實聖謀之默契經始勿亟方施礱密之勤吉事
有祥爰發嶢巖之蘊陽融陰結玉質金書諒由太極開
闢之初已兆聖時嚴配之盛文在中也天何言哉恭惟
皇帝陛下體道宅尊求端順則祇守聖人之寶聿興王
者之堂嶽立雲垂一定工圖之大龍跳虎卧再觀宸翰
之奇宜申命於上穹因効靈于巨礎信彼山川鬼神之
類罔不是依較夫河圖洛書之求此尤有赫臣恭逢極
化親覲殊休握乾符而闡坤珍方隆坐治舞后功而詠

君德敢怠對揚臣等無任

賀芝草瑞穀並生表

臣某等言和氣致祥荐生神草大田多稼密附靈根天
寶申休物因效祉中賀竊以曾孫來止乃臻百穀之成
上帝博臨斯有九莖之秀惟天人精稷之相感則禾菽
交貫而同榮有開既堅既好之初無害或耘或耔之際
豈止三農之慶蓋彰一德之符恭惟皇帝陛下道格二
儀仁施九壤受小共大共而有駿厯之惠即康功田功

而無盤遊之娛出彼晨華方永綏于多福託于秋隴將
迄用于康年臣無助財成幸觀昭假詠歌周道願陳高
廩之篇回復漢都竊陋齋房之作

又賀瑞穀芝草表

臣某等言嘉穀盈疇實函斯活靈芝被野既庶且多有
煒冊書均歡寰宇中賀竊以異畝同穎益常見于周邦
連葉九莖亦僅生于漢殿未有蕤蕤之稼協穗如雲煌
煌之英貢篚系道會南陽之凡數登百者三來安化之

提封號萬者五允謂非常之瑞盛超振古之傳恭惟皇
帝陛下凝命穆清玩心昭曠政格九功之叙德通四氣
之和燕及皇天用集歸禾之祉震于珍物更繁產草之
祥臣竊預榮懷幸觀孚佑自今以始共慶千倉而萬箱
無疆惟休永對一年之三秀

賀鎮海軍等祥瑞表

臣某等言上天之載無聲所助者順諸福之物畢至永
孚于休歡動綿區慶歸當宇中賀竊以道大天大地大

王位其中心和聲和形和氣無不應自一人之有格馨
六合以來符膏露咸濡靈芝競秀木衆支而內附竹並
幹而同榮帝貽來牟多至五穗園有嘉卉類成雙葩告
萬壽之期則長春層敷示百男之兆則夭桃駢實金花
絢彩冰瓦藏文胎仙翱翔鷺鳥衛翊介寶六眸而玉質
孺禽再獲而雪衣郡國相望以上聞品類不可以遽數
恭惟皇帝陛下道超振古仁及羣生奉三無私以乂邦
有萬不同以成福膺二儀之景命永言保之披四海之

瑞圖維其時矣臣親逢熙洽竊預榮懷鋪張願告于神明紀錄幸光於簡冊於斯為盛欣共對於王休以莫不增敢載賡於天保臣等無任

賀深州等處衆瑞表

臣某等言皇天眷命方昭可告之功品物流形並效非常之瑞慶歸當宁歡浹綿區中賀恭惟皇帝陛下道妙範圍誠參化育五者各以其叙既鼓舞之以盡神萬物皆出于機雖雕刻而不為巧乾端隕祉坤載產祥美光

燭而膏露零綠竹實而嘉禾茂岱宗望幸紛三秀之芝
房泮水承風蔚雙敷之蓮萼六榴共本衆木并柯二犢
同生八蠶自繭舞鶴來翔而玉質胎禽下集於琳宮六
府三事之修百神爾主故四海九州之大萬福來求臣
親遇熙辰竊霑榮渥鹿濯濯而鳥翬翬已邁前聞麟儀
儀而鳳師師更期創見臣等無任

賀汝州等祥瑞表

臣某等言聖功丕格神人以和福物胥來天地並貺盛

超千載驪逮八紘中賀竊以國安多祥氣順成象郁雲
霄之五采紛芝菌之九葩麗譙儀羽鶴之羣折薪出金
僊之字如竹苞矣零露滑兮同穎雙岐有相后稷之穡
合枝並蒂知涵虞氏之恩鋪張闕休昭受上帝恭惟皇
帝陛下德施日普道化川流克寬克仁而信兆民時純
熙矣不難不竦而總百祿天人奉之乃集三靈之釐荐
受四方之賀臣竊深賴慶咸侯勒成卜名山顯位之登
乃并是吉延共貫同風之祉於萬斯年臣等無任

賀麟州等祥瑞表

臣某等言帝命不違眷于一德天休滋至覃及四方凡
在燾臨惟胥鼓舞中賀竊以諸福之物其出同時百順
之名蓋彰有道芝房競秀華萼駢敷庭零膏露而自均
地湧醴泉而不愛壽龜游於蓮葉異鵲馴而雪衣桃雙
實以協多男之占木并柯以象殊俗之附自郊庠而効
見跨邊鄙以來符應誠兼德於三靈按牒殆踰於千計
恭惟皇帝陛下治超邃古澤浸羣黎聖功上際而下蟠

仁化東漸而西被神降明出祥多國安保合太和通天
下之一氣緝熙純嘏介君子之萬年臣幸列近司預觀
衆瑞願揚丕烈登泰山以告成更集珍符開明堂而坐
治臣等無任

賀汝州等祥瑞表

臣某言聖人執契廣動化之中和天瑞應誠徧販章之
土宇光超載籍歡浹羣情中賀竊以躍舟臨屋之符其
臻未衆歌廟紀年之事厥類惟微方上帝之眷臨覩諸

福之畢至仰則甘露景雲之薦祉俯則靈芝嘉穀之効
祥木多相合之條支草有自雙之華實竹垂黃蘗或穿
栢節之堅鶴聽玉音亦集詔文之上昭示春命者率再
三出具列奏對者凡五千餘蓋協氣之橫流自生民而
未有恭惟皇帝陛下中正履位聰明憲天成鳧驚既醉
之休跨魚麗華泰之盛德無遠而弗届四方攸同神有
開而必先百祿是總物其多矣皇則受之臣親遇熙辰
頻瞻景貺陳常時夏允無此疆爾界之殊袞對敷天不

勝喬嶽墮山之望臣等無任

賀中山府慶雲等衆瑞表

臣某等言慶雲在上仰占紛郁之輝和氣致祥俯驗盛
多之物函封狎至塗頌交興中賀竊以莫高者大所親
惟德有生之類可妙以神乃若雲呈五色之符油油表
瑞地蕃衆萬之品一一效奇聿觀紹至之休允契丕平
之運恭惟皇帝陛下功隆下武道協重華毓萬彙以無
所不愛之仁贊二儀以大而能化之聖財成輔相所左

右者神祇祖考以安樂之乾端坤倪雖遠而必屆川珍
嶽貢不約而自來臣幸造明庭願施大澤通天下一氣
誕包有截之區介君子萬年用衍無疆之歷臣等無任

賀日暈慶雲并泰寧軍等祥瑞表

臣某等言至德要道通於神明協氣嘉生塞乎天地祥
編屢溢歡頌交興中賀竊以敷政而百祿適受祐而四
方賀日騰瑞氣雲絢慶霄醴泉膏露之涵濡羽鶴介龜
之遊集神芝薦祉植物效休由觀象於璣衡合奏章於

郡國遠近三十餘所實跨幅員大小七百有奇並應圖牒恭惟皇帝陛下道參邃古澤浸羣黎超夏禹之平成極周文之逸樂萬物由儀之效維以遂歌九州共貫之祥莫不畢至臣並承寵渥竊預榮懷握乾符而闡坤珍方延億載舞后功而詠君德願答三靈臣等無任

賀荆南等處祥瑞表

臣某等言聖人執契與物皆昌天瑞應誠如川方至慶歸當宁歡逮綿區中賀竊以祥多則國必安民和而福

乃降帝命率育有野蠶繡穀之貽天德出寧多仙鶴異
花之應大巧至形於獸石靈華更茂於神芝百果用成
多男是卜衆支內附殊俗攸同蓋九功有惟叙之歌放
諸四海故萬物以不誣之理媚茲一人恭惟皇帝陛下
道與天通業侔地富虞氏之恩被動植既聽簫韶之成
文王之德及昆蟲有來臺囿之樂宜通率土並薦嘉生
是謂質諸鬼神而無疑于以編之詩書而不愧臣共深
感遇尤幸對揚德罔有於二三已格清寧之貺物自至

者十五何辭云岱之封臣等無任

賀真定等處衆瑞表

臣某等言聖神體道通元化之機緘天地應祥順太和之橐籥騰章累至舞手胥歡中賀恭惟皇帝陛下統乾以純粹精位履以剛中正受命既固降福孔夷達於得一以生之情來為有萬不同之瑞竹簣其實露凝如飴灼灼之華秋敷懔懔之麥冬秀禾駢穎熟蟠抱草枯沼毛多連帶而芳陸產或合同而化九莖附石黜淮南俄

度之凡二米共稔協后稷肇禋之慶有邦並貺惟聖克
承按牒披圖知天心之所助紀年薦廟宜帝命之弗違
臣共幸親逢尤欣先覩自今以始方迎時萬之休其類
維何更闡日新之盛臣等無任

賀雙桃衆瑞表

臣某等言明德維馨乾坤率籲至誠能化符貺大來班
賀相仍冊書有繼中賀竊以高卑異位上天之載無聲
遠邇同風諸福之物畢至寶龜玉質異鵲霜翎康年多

稼穡之祥順氣鍾水陸之產野蠶自繭木蠹類蟬雲起
封中啟玉檢告成之禮鶴來天寶當琳壇本始之辰道
方六闢而四通言猶一掛而萬漏恭惟皇帝陛下中正
履位聰明憲天臻臯鷺既醉之休跨魚麗華泰之盛集
三靈之景命永言保之披九壤之瑞圖維其時矣臣叨
聯輔拂莫測範圍咸造在廷共頌無前之績敢拜稽首
願揚百世之光臣等無任

賀台州嘉禾一稔二米表

合宮定位方鳩僦功嘉種應期以歸肇祀懷生共慶有
開必先中賀竊以寧神者以四表之歡心用鬯者資二
米之和氣洽豐年之酒醴升至治之馨香實於卣尊酌
以圭瓚周公之成洛邑式舉明禋平王之錫文侯是昭
顯德於赫海邦之獻允符陽館之榮蓋九筵九陛之規
於茲有作故一陰一陽之道用薦厥祥天與人謀物為
時出恭惟皇帝陛下道心淵靜聖政中和閔休翕受於
二儀曠典兼隆於三代欲躬行於嚴配且肅備於裸將

廣文王之聲芑自來於豐水誕后稷之穡秬果降於有
邠臣叨列近司竚觀休享申旱麓之百福黃流在中歌
漢江之萬年令聞不已臣等無任抃躍之至

賀河南府嘉禾芝草同本表

祥發陪都慶聞當宁覆函所逮呼舞惟均中賀竊以未
獻周邦以篤曾孫之喜芝生漢殿於昭上帝之臨雖薦
祉於一時實効珍於二本未有陰陽之異產並蕃河洛
之與區協穠殊並儷仙英而競秀吐柯載葉附長畝以

爭奇恭惟皇帝陛下道參化育功格平成孝弟感通翕
受神靈之貺慈仁熏浹存臻草木之和是謂非常之時
有來諸福之物臣猥叨分閭莫遂造廷嘉頌傳聞識崇
寧之丕應瑞圖雜驗知大觀之無疆臣無任抃躍之至

賀蘄州芝草表

臣某等言聖德動天靈芝薦地多踰萬本應萬壽之無
疆中出九莖表九功之惟叙光騰圖牒歡見幅員中賀
竊以神草之生仙經具載飛鳥升龍之狀貫珠偃蓋之

形紫雲飴露之所濡石室金堂之是閔為此斬春之獻
統於魏闕之陳色備焜煌儼肪截而栗潤氣相回覆分
櫛比而墉崇既庶且繁於斯為盛恭惟皇帝陛下道心
朝徹孝治日宣帝省其山首驗由儀之化物和於野共
霑行葦之仁允宜三秀之英併有一人之慶臣共承丕
貺尤幸縱觀備禮以告神明願同周室下詔而賜牛酒
竊陋漢家

賀亳州太清宮紫芝表

臣某等言天垂純祐地薦嘉生示基祚之重熙介聖神
之萬壽若聞若見或嘏或歌中賀竊以三秀敷歲遠但
傳于靈囿九莖茂蔚近或產于齋房未聞還丹五色之
餘忽效吐葉千層之瑞恭惟皇帝陛下恩漸動植孝格
神明具來申錫之休載獲博臨之貺有本者如是式符
蔓蔓之期無不爾或承更衍穰穰之祉臣限縻藩閫阻
造闕廷無任

賀湟州瑞金表

臣某等言河湟故壤德罔不孚天地珍藏時然後出慶
均遠服歡溢中區中賀竊以國有五材金凡三品若時
上幣獨貴精鏐彭蠡既涖貢始來於揚土淮夷卒獲獻
方集於魯邦發於隨山刊木之餘得必橐弓戢戈之後
睠西戎之即叙嘉舊俗之惟新我陵我阿實畝實籍既
大同於一氣於變時雍乃崇降於百祥不愛其寶恭惟
皇帝陛下誕膺駿命純佑多方躬堯舜孝弟而力行復
文武疆土而加闢浮于積石載歸輿地之圖自彼氐羌

悉入州人之掌是臻神物以顯伐功臣竊預邦榮幸觀
廷列遂通絕域詎須宛馬之齎用紀休符豈但漢麟之
鑄臣等無任

賀越州瑞金表

臣某等言天其申命福物既充地不藏珍吉金自出見
聞所逮呼舞惟均中賀竊以鏐瑩之英堪輿所閱鑿山
十丈深或困於披沙韞石千年久難期於化玉未聞澤
銑近獲撫田發應社之神光參禹書之貢品雖我無事

而民自富貨且弗居蓋乾知始而坤作成寶宜不愛恭
惟皇帝陛下道施六府政裕五材聖集大成聲自全於
條理言從作乂事兼叙於彞倫仍格休符以資美利卅
人何力有同林邑之流內府是歸奚啻櫟陽之雨臣幸
塵眷渥莫測範圍紀昆田之祥寧鑄褭蹠之狀條岱宗
之祀願泥玉檢之封臣等無任

賀潭州瑞金表

臣某等言道格坤輿不愛其寶祥開湘土厥貢惟金景

既繁臻歡聲咸暨中賀竊以禹平三壤治先六府之修
箕述九疇事首五行之叙惟精鏐之所在實美利之攸
資遠或閔於嵌巖細殆煩於披揀有來珍物爰俟聖時
神發山藏天成魄聚重兼百鎰可輕巢水之搏粹甚雙
南不待櫟陽之雨恭惟皇帝陛下業侔地富德與天通
政以格民無憾養生之厚言惟作乂不違從革之和允
宜寶藏之興大受邉人之獻臣幸聯黼黻無助財成入
內府以奉王衷蹠何用祀明堂而配帝金版是恭臣等

無任

賀辰州收到楠木表

臣某等言合宮經始天且弗違大浸發祥木不勝用流
聞四海欣喜一辭中賀竊以聖人作興有莫致而至者
上帝眷顧不待求而與之惟重屋之肇營非前王之敢
議九筵宏構方密考於周官十仞瓌材已交浮於沅水
先登於岸有覺其楹初無虞衡斤斧之勤並中工師尋
尺之度時哉景運貺此大功恭惟皇帝陛下光紹丕圖

懋追先烈欲順時而布政思嚴父以配天乃恢萬世之
基爰定一堂之制神祇祖考之意咸俟慶成山林川澤
之靈並來休應以佑我將之享益隆大壯之規臣親列
近嚴竚觀輪奐孔曼且碩大奕奕於魯宮方斲是虔邁
九丸於商寢臣某等無任

賀仙井監宣聖座生芝草表

臣某等言儒風丕變芹滋泮水之宮聖德潛通芝秀尼
山之像光昭史冊歡浹民謠中賀竊以三代皆以學而

明倫斯文未墜萬世一遇聖而知解其教乃隆歷觀往
辟之規徒謹素王之祀天地之全未覩道術之裂莫同
逢神考之作興表章六籍迨皇明之紹述鼓動四方議
銷搖沮之徒法備賓興之美自上都而首善罄率土以
承流衡統紘縵有儼大成之宇金石絲竹或聞數仞之
墻所存者神如在其上乃產九莖之瑞默彰一德之交
恭惟皇帝陛下道本生知聖由天縱息邪說距詖行亦
既率從下明詔發德音每先樂育郡國增生徒之數蕃

夷遣子弟之來嘉氣迎興已格虞庠之應靈華生體更
申蜀學之休臣親遇泰寧預承昭假鳴鑾槐市觀光豈
但於橋門檢玉岱宗望幸想深於闕里臣等無任

賀醫學芝草表

臣某等言聚賢命教肇開黌舍之嚴愛物好生迺格芝
房之瑞天其孚佑民用交欣中賀竊以黃帝之述方書
亶惟聖作成周之治疾癘實廣上恩世或昧於淵源術
乃淪於工技會逢熙盛參考古初增其官師訓道之員

崇以經術義禮之學羣士慕嚮迪我德心協氣橫流產
此神草玉蓋金莖之競秀羅紋紫點之相鮮對敷講肄
之庭昭示睠懷之意恭惟皇帝陛下執慈為寶體仁如
天常善救人益運道樞之妙博施濟衆共躋壽域之安
煌煌三秀之英顯顯十全之應臣幸聯輔拂親覩休祥
荷帝博臨豈比元封之賜與天相畢當符抱朴之書

欽定四庫全書

集部

初寮集卷六

詳校官庶吉士臣張溥

侍讀臣孫球履勘

謄錄監生臣尹大謙

欽定四庫全書

初寮集卷六

宋 王安中 撰

碑文

定功繼伐碑

奉勅撰文御筆賜名 案資治通鑑綱目宣和元年六月夏人來詔

童貫罷兵分注云關右既困童貫諷夏人因遼進誓表及夏遣使來賀天寧節授以誓詔夏使辭不取強之持還及境棄之而去此碑所言歟塞請命皆粉澤之詞蓋非當日之事實也

上帝眷命有宋既付中國垂裕于億萬世惟帝有訓自時與宅外暨海隅四夷百蠻咸俾臣屬惟我祖宗克對

大命德澤之所滂漉仁風之所流行無此疆爾界之異
故冊書命節顯服威靈之封加于三代弗錄之邦元龜
大貝南金象齒之貢來於九譯窮絕之域若乃錫土胙
氏越在外藩世賴國恩以生息其黎民孫子厥有弗虔
則六師之所必移九伐之所必誅蓋上帝之命則然其
孰敢廢西夏自繼遷叛命盜據靈武至元昊僭竊踐有
銀鹽甘沙之地因舊保鄯增建州邑稍寇取旁近部落
附益其衆歷諒祚秉常三世自擅不討而青唐吐蕃河

南諸羌錯居隴西湟中南安金城故地雖外示恭順而
內懷顧望名相犄角而實為脅輔荒忽靡常數為邊患
神宗皇帝天錫勇智高出百王之上創法立制內治既
穆攷圖數貢乃始慨然有鞭笞四方之志顧茲西鄙逋
誅積歲爰因神人之憤肆興師征於是擢王韶於疎逖
曰韶汝嘗獻書請事河隴以制夏人今予付汝以將帥
之任往惠汝言以底乃績聖畧先定動無遺策一舉而
城熙州再舉而拔河州遂拓洮岷別為一道邊堠益斥

且扼青唐之吭斷夏人之臂矣秉常甫立亟為分畫之請詭譎不忌時時小入盜邊隨擊隨卻元豐四年邊臣上言梁氏顓政國人攜貳侮亡攻昧茲惟其時詔以五路兵進討李憲出熙河种諤出鄜延劉昌祚出涇原高遵裕出環慶王中正出河東會兵興靈共覆其巢居諸將戰比有功夏人瘡傷者什七八餘衆跳遁明年大築橫山之要樓櫓相望淺攻耨耕賊不復敢留塞下其經理控馭之略甚遠且備元祐之初乾順紹封在廷倡言

棄地乘障之臣希意和附卒以元豐所築葭蘆米脂浮
圖安彊四寨遺賊至於熙河之女遮安遠一切廢罷而
邊城隤丸踰境畫不撤備賊知吾中國易以計動不自
厭滿分畫之議無慮三四變哲宗皇帝親政之始深惟
寧人有指疆土既底厥成而羣謀弗臧虜國玩寇聖孝
感發當饋喟歎謂輔臣曰熙河分畫已再至而背約遷
延宜增備力守勿復與議賊情惶怖請遂如約既詔不
許因命薄伐將士賈勇思奮所向輒克河東復葭蘆環

慶復安疆廊延復米脂後進兵築南牟會為西安州幅
員千里東界麟府西抵熙蘭土壤衍沃物產饒阜故時
山界聚落內屬者過半矣元符二年王瞻畫取青唐乃
決策招納於是河南大首領果莊之子巴爾斯博恰舉四
城來降瞻引兵渡河以夜半發徑取邈川夏人大懼失
援謀襲我師統帥趨戰益急瞻遂提孤軍入青唐降偽
主向於大定而初謀內搖外庸弗訖然夏人已徜徉縮
栗不得西結諸蕃勢危力竭更緣他援求成於我中國

之威茲大振矣皇帝嗣服永惟上帝祖宗畀付顧託之
重在予一人仰遵神考燕翼之謀哲廟繼述之孝大修
政事嘉靖區宇天地並貺神祇安樂封畧之內冠帶之
倫函蒙祉福東盡出日南極丹徼皆跂踵面內而北國
寢衰初弗敢桀道德之威莫不震疊獨茲一隅遺孽未
殄尚或繹騷上曰嘻惟予父子兄造攻自西絀誹排疑
克就不烈圖功攸畢予何敢怠其奮予武斷以必伐粵
崇寧二年先於青唐王厚出河州破魯格特堡斬大首領

額琳沁獲首千降戶五千高永年出蘭州開通湟路降二千合兩道兵三萬衆傳湟州賊堅壁以待外救攻之三日不下乃別遣驍將選卒間道疾驅渡宗河毀水寨火浮梁以絕其援奮兵四面急擊拔之斬首二千降戶五萬築綏遠關臨宗寨進兵撫定河南部族十餘萬偽王子錫巴袞以其族降獨勝宗隘諸族未附亟討平之湟今日樂州三年夏合熙河涇原秦鳳兵樂州分道三永年由右張誠由左厚統中軍直趨星將硤會宗噶爾

川偽王子錫魯蘇悉其精甲來拒諸將鏖戰自朝至晡
士氣彌厲金鼓之聲砰隱山谷賊棄仗走尾擊五十里
斬首四千降戶十萬錫魯蘇妻回紇偽公主以其衆來歸
且納隆持特城管鑰進據廓州遂城鄯善以為西寧州冬
遣劉仲武潘逢擊河南諸羌之反側者斬首千餘誘偽
王子趙懷德降獻於闕下詔授懷以雄武之節封順義
郡王四年夏錫魯蘇復結賊入寇圍宣威城遂犯廓州新
邊為之搖諸將夾擊則引去追斬數千大觀初謀告土

蕃藏怎巴特噶爾據錫桂城招結蕃族稍創文法立名號二年詔發兵六萬討之仍分軍濟河為翼遂拔錫桂城以為積石軍藏怎巴特噶爾以其屬降移師收青藏川以為洮州大首領默錫勒羅密克率戶五萬來歸師踰青海至節占城草頭回紇族數萬官其酋豪通道于閼底貢寶玉而地闢青唐之外矣夏人自前犯會州為劉法所敗屠和爾提克泉略烏爾戩川乘冰堅踰河蹠跡四百里俘斬萬計餘皆麋鹿散不思自保至政和元年猶挾畫疆為請氣鉗

議先形露虛喝邏騎越軼要衝輒自為塹畔既賜銀川
石堡則益螭蠋偃蹇不即馴弭四年始上誓表設詞譎
謾報以優詔使人置於保安傳舍而去更入鈔略造為
兵端六年誘蕃官趙懷明殺邊吏率衆而奔始命以諸
道兵討之先是上嘗以禦賊形勝語諸將曰古郭隆地
下瞰西涼清水河逼烏鬬戩渡壓賊右廂城此則賊在吾
股掌中於是法出樂州據古郭隆築震武軍仲武出會
州據清水河築德威城賊悟來爭擊敗之禽其酋領斬

馘數千秋觀兵環慶招撫叛黨望風來歸者相屬懷明
內悔齟舌發疾半廢因遣姚古築鎮安城苴補障塞達
於廊延斬撓蕃賊首五千得鎧甲馬牛羊橐駝以百萬
計七年賊入環慶城佛口谷偽號成德軍圍邊壘三十
六陷濟義堡又攻破佛口并敗賊外援斬首三千生縛
惡首李賞樵卜等千餘人乘勝分兵築熙河涇原河東城
寨十數誘懷德弟尼瑪丹怎以歸賊猶數侵竝寨上震
怒詔諸將以兵二十萬絕磧窮討前直蘭會築日本多泉

偽號治安城直廊延築藏丹河偽號洪夏軍皆賊蹊所
蔽而藏丹尤斗絕連歲不能取於是种師道統兵進攻
以次斬首七千禽偽監軍以下首領千數遂築制戎城
賊益感恚極而狂僥倖一戰冀少償所失亡則眎其下
猶有辭宣和元年舉國來寇廊延陷鎮青堡涇原陷靖
夏城進圍震武軍結河南諸蕃攻積石軍洮州上用不
赦詔涇原合熙秦兵平克特口廊延西合環慶兵平齊
吉克臺合河東兵擣沁布班堆又分秦鳳河東兵擇利

深入六路同日濟師賊乘間再圍震武諸將自涇原晝
夜倍道往賊出不意噓默褫氣遁不及顧遂焚聚落夷
險隘斬首萬餘獲生口孳畜不可訾數乾順款塞請命
辭意確至有詔班師凡平青唐吐蕃全國建州四軍一
關一城六寨十堡十二降王子三部族二十萬俘斬四
萬收復夏國地數千里築軍一城七寨五堡壘二十四
破賊城八禽首領三千降部族二萬斬首五萬初乾順
憑藉父祖餘資狃國弗誅乍叛乍臣靡有寧歲青唐既

減兵在其腋左支右潰不戰自弊土宇日狹又失金繒
之賜皮毛糗糒久不自聊逮茲悔過上未欲以赫然一
旦之怒鉏其垂盡僅存之種詔語中出歷數其罪而切
責之仍戒以守今定界無所計議大哉王言非復向來
姑息優容之文乾順聽命惟謹即日進誓天寧元正陪
臣來朝惴惴不敢失館人膳夫毫髮意迄今三年乃手
製御帳以獻因求賜監書欲以古今君臣大分自誓其
意蓋可知已於是羣臣奏曰西鄙用兵垂二十年惟陛

下神略誕施威愴德洽受俘端闕慶捷紫宸駿功巍巍
燁燁古昔願紀之金石訓諸無窮上以命臣某臣某竊
伏聞之曰昊天所子為中國君天大奉之必將侈其土
宇荒遠之裔順天者存違天者敗此理之常昔者朝鮮
誘納漢人裂為四郡樓蘭遮留使者首傳北闕匈奴呼韓
邪內附則擁護以安而北單于自絕沙漠竄亡之不暇突
厥頡利弄兵渭上刑白馬盟便橋未幾為唐所敗脫身
走保鐵山卒禽之漢唐且然況吾有宋之盛陛下神聖

為天所子為無不成欲無不得天方授我不獨以此陛下兼覆無外特許乾順修貢天地大德雖臣莫得而名若夫西戎即叙神考之功哲廟續之陛下成之臣謹播之聲詩以奉揚無前之偉烈敢拜手稽首獻詞曰

宋承帝命光宅中宇蠻蜚夷戎悉臣悉主維我祖宗仁聖一心與帝分職靡不懽臨彫戈彤弓玉符金券孰為世守以封以建毋貳厥心覲享以時有弗來庭帝不汝私蠢茲西戎恃險用詐遁逃靡悔盜有靈夏自遷再傳

吳驕卒狂帝亟削之使內自戕肆及秉常逋誅積世青
唐連鄰陰為脣齒明明神考聖智自天閱書于匭亟行
韶言曰汝往哉先事河湟版圖六州扼賊喉吭乃築橫
山障塞千里聲震興靈屋瓦飛墜元祐之初棄我翰藩
賊張婪酣滋無盈厭哲廟親政爰始繼伐曰寧人指予
敢不力師直而義遂復侵疆天都南牟樓櫓相望瞻既
入湟功潰于成天其或者以授于今皇帝嗣服事遵熙
豐載揚我武聿圖寧功分命將臣訖此外略使軺涖止

以究以度臣厚偕止于湟合兵羈其名王翦其屬城過
師青海冠帶回紇通道于闐底貢方物夏人內憂倔強
自誑行人失辭置詔而往鼠竊狗偷不恥敗奔誘納叛
亡實開兵端間悉其有以伺吾急左逐右入遂無寧歲
帝赫斯怒底天之罰百萬齊驅勢若摧拉有執其豪有
馘其醜有摧其鋒有躡其走言言其高我有城阻翳翳
其荒爾無室處賊窮呼天丐此項領猶懼不貸遑敢它
請天惟畀矜聽其內附汝以誓來予則赦汝賊捧詔泣

申以誓言貢篚在廷不懈益虔皇帝曰嘻上帝是荷伐
叛三世告成自我自彼河隴全為王民夏人所餘僅在
彈丸皇帝曰嘻內外治異不有師征外鮮克畏畏而舍
之懷徠孔易天生五材兵不可廢昔在藝祖首春踐阼
夏取澤潞冬拔揚楚膽落四夷業垂萬年茲予守邦敢
懷宴安天方授我溥天率土負固必誅擅命必取有順
而嚮不失汝所德刑並用孰敢予侮咨汝夏人其益自
戒汝弱可兼予恩不再羣臣稽首賴天子明西戎即叙

孝極廣聲神考之神哲廟之聖天子之功上帝之命羣臣稽首聖功巍巍威震朔南敢不來歸來歸不遲畢朝明堂臣作頌詩以訓萬方

記

清州靈津廟記

奉勅為河清重修代
轉運使沈純誠作

天右序有宋正域四方融結複重表裏險壯乃眷北顧造設形勝惟河海統會川瀆大無與侔宜為中國襟帶抱負之勢上帝有命百神率職相與回河斗折下趨瀛

霸匯于盧臺之野紆餘平衍限絕虧疏包有藩垣障塞
之地屬之於海濤波之滲漉潮汐之吐吞則又益于陂
塘東西際連是為天塹綿亘千里無復越軼之患氣象
雄奧扶輿磅礴足恢朝廷道德安強之威大觀初元天
地之貺應期紹至川珍嶽貢與夫草木羽毛之瑞沓然
前陳九月河水時至自乾寧而上八百里清湛一色可
燭鬚眉日晶月輝涵泳空洞龜游魚躍散布深狀蓋七
晝夜而後如初水衡上聞宰相率百官扣閣頓首賀皇

帝曰噫上帝眷佑予敢不欽其以乾寧為清州制下瀕
河耄倪手舞心拜驩聲動天帝益順賚乃奔走海若俾
出雲興雨無或失時節縮河流避民黍禾歲中再穫用
贍給于公私號新政和既大為之防以節止塘水役不
告病隱然時成而榮光發祥又在于扶蘇之口如鑑如
練同向所見跨地加遠而積日倍之于時東南海水亦
復澄紺明澈効祉相望披圖按牒千百載不一睹而同
時並貺天意昭晰由三五以來未之有也皇帝方寅恭

謙虛推報于上下神祇咸秩無文以荅殊祉故于巨流之所會歸靈跡之所顯暴尤以加意異時獨流西崖有顯靈順應神妃祠成以居人之私力簡陋窘偏不稱象服冊號所以崇極之制皇帝高拱巖廊之上千萬里之遠靡有弗照睿旨中出俾本部漕臣撤而新之專實始商度請少徙百餘步稍附益隄面創營新宮圖上而專罷申命臣幾董領鳩工棧木而幾移帥常山臣純誠適蒙上恩擢使專被中詔崇飭厥事築以元年之秋裁以

二年之春迄某月某日甲子乃成題以前所賜名曰靈
津之廟金帛取於經用之餘卒徒料於役使之羨工之
積三萬四千有奇材木甃甃未陶之坯丹堊鐵石絹葦
紵漆之物條計枚數銖稱尺量無慮百萬而郡邑近民
之有司初不與知凡廟之屋為間者百六扉前啓五殿
中峙齋廬嚴靚環廡修殖齒萃焜燿神其來舍考室之
日臣純誠盛服即事薌幣明蠲牲酒芬烈祝史正辭以
皇帝報貺欽崇之意告于有神空馭充廷煙霏徘徊河

聲恬徐斑斕蟠蛇之物踊躍出聽海之神山貝闕延吐
雲景光氣以相映發邊人縱觀並受福禧思德務報咸
致萬壽無疆之祝而一水之外黎民赤子悵慕跂立至
於齋嗟涕洟大哉有宋之德所及遠矣臣純誠材下幸
備乏使嘗請記事之成鋪張閎休而制旨因以命臣若
夫營作之本末前已槩見臣純誠謹按清之建壘其來
久遠天將有興周世宗頗開拓土宇為吾聖代驅除顯
德中收復關南自浮陽御龍舟順流而北太祖皇帝神

武英發盡護水陸之師所向輒下遂平三關明年受命
以有天下惟此始征之地實基帝業太宗皇帝睿謨經
遠因縣置軍以固疆圉聖聖相授與天同仁並邊之民
斑白野處不聞犬吠之警是宜河宗谷王出見上瑞以
為太平之符詩曰薄言震之莫不震疊懷柔百神及河
喬嶽又曰允猶翕河敷天之下哀時之對時周之命古
之盛王制法立政既足以震動萬邦則神明顧懷雖河
之善溢難制且使柔順聽命至於信能翕河則哀天下

之神而禮之以永厥命二篇之詩蓋相後先恭惟皇帝
陛下躬有聖德天錫獨智自初臨御深惟神宗皇帝立
經紀之志紹修先烈小大悉備天下復見熙寧元豐之
盛自開洮隴奄有積石故地禹貢所書導河發源漢唐
之所未覩而踰度其處曰崑崙紫山云者由首及尾悉
入封畧之內歷星柳與井至於昴畢之分朝宗於海初
無決溢橫潰之虞迅流巨防自成長利則所以震疊懷
柔者於此可見乃若澄波之瑞固已升歌泰壇歸美宗

廟示不專有而靈津之祠僻在徼戍親詔繕治務極隆
顯則裒神而對之者殆無不及昔我章聖皇帝既奉真
符陟岱宗天步安夷珍物紛委於是河清于陝郊者再
其後祀后土於汾陰竝配太祖太宗還駕嵩洛親謁寢
兆以至迎仙宗於真游款道祖於亳社大曲畢舉垂光
冊書皇帝陛下薦膺丕貺同符真祖裒神對越協于周
頌意者遠覽詩人沛膏澤之博近法祖宗廣符瑞之富
舒德發號勒功告成以闡萬世無窮之休三神百靈與

夫九州四海之衆猶冀旦暮遇也臣純誠敢緣廟事并
著之臣謹記

河間詔書記

臣某崇寧乙酉春蒙恩擢帥高陽親承德音申飭疆政
臣嘗從事于瀛其後三奉使指周旋北道夤緣官乏攝
領鎮定形勢險易備豫後先舊頗習知顧臣非其人也
矧三關被邊最河朔勁兵處猥見推擇尤懼無以仰副
聖訓惟是承平日久中外晏夷祖宗在天臨蒞大信借

彼蠢爾誰敢動搖邊臣時裁取充位而已雖文墨議論
不忘搶攘徒淹歲時無甚赫赫聖上躬按吏瑣錄臣勤
竭鋪舒睿藻洒落宸翰躡陞扈從再屬閭寄臣竊自念
才分迂淺而寵任超踰是速于咎乃抗章祈免手批腴
渥弗容懇避皇恐祇命具如上旨臣謹按高陽置師歲
在慶厯戊子距今六十年矣親詔再留蓋自臣始臣考
之前載璽書增秩言或予代縱筆大字未厭民觀伏惟
皇帝陛下道心精微聖學高妙形於聲畫神動天隨昭

回之光乃責鄙陋臣固不足刻畫大巧意者寶訓所在
百靈來拱物無疵癘而兵寢刑措因刊於石以侈非常
之榮亦庶幾並邊之民與受其祉若夫忠義稱報則子
孫以之豈特捐臣之軀也哉臣不勝昧死謹記

博州勸農記

代

上嗣服十有二載天人同和風雨順序野蠶繭麥之瑞
史不絕書三農滌塲百禮既洽冬十有二月申考四時
之政以興嗣歲乃親御翰墨詔天下監司守令時節郊

野勸相農事明年春土膏既發自河之北南逾京輔甘
澤滂注者三尺歌謳布野耒耜畢出更久不踐阡陌懷
詔惶顧方問儀于耆宿而本道安撫使北京留守已涓
日同部使者屬民於近畿植勸農使旂於田中讀詔旂
下延禮其父老而教戒其子弟來聽者蓋數十萬人歡
聲四傳列城聳動部使者亟以其事曉所隸郡會博闕
守臣某實領郡務遂以三月甲子率官吏至郡之西二
十里崔度傳舍合聊城堂邑旁近鄉民設庭下之位揖

笏出詔書讀示并道上惻怛愛民敦本之實德因犒其
高年授以善本扶藜垂白既醉以酒相與羅拜呼舞請
祝億萬歲壽以報和氣熏浹風日妍麗林霏草露皆有
欣榮之色惟是天語諄複易感而難盡必得老於官學
信及閭里者日相講誦告語躬先唱導表率則有百倍
於吏之力於是又即南城致仕宣德郎孟介之廬就致
上之德意退則以詔刊石且屬臣某記其下臣竊惟國
之大本在民民之所寶惟穀二帝三王之盛莫不務此

稷官之建民時之授祈報之禮補助之政具載方冊推而行之每在平世若昔藝祖配天立極由建隆至乾德再以尺一之詔敦勉農功用垂法于後聖太宗既耕帝耜爰命州縣立農師以教種藝章聖在御乃始分道置使賜以農田勅令俾知所承祥符中又因呂夷簡有請悉蠲農器之稅仁廟聖性恭儉惟稼穡是好明道再耜弁冕舉趾進至十有二跬三公已下盡蠲乃止迨我神考稽古創法肇開千畝於國之南而又置常平之官定

蠲役之令修水土正經界所以惠遺天下德至渥也上
遵制揚功悉復熙寧元豐之舊聖孝感格既屢有年而
親詔丁寧上以無忘列聖之德下欲元元之衆臻于富
壽當是之時豳風駉頌與漢文景區區一切之事蓋不
足道惟臣某之先伯祖文忠公齊嘗參仁廟政事某父
延慶被遇神考入直禁林出典方面臣某亦頗習知朝
廷舊典宜能雍容精白推廣聖志而布之于民惟博於
禹貢為兗州之野土地沃衍並宜五穀之產織文絲紵

饒於四方聖代承平民力一無所用家有祖父相授之
業野無尺寸不毛之田顧今乃與率土之濱亟蒙詔恩
自邇以眎遠凡播告之所及以求稱上旨者宜如何耶
深耕易耨奄觀銍艾以供有司之賦以足仰事俯育之
計慈順輯睦日用飲食相率無犯上之教令則家給而
國用充刑措而天下服詩不云乎帝命率育無此疆爾
界陳常于時夏臣愚所幸如是而已豈特為博人誦哉
臣某謹記

北京深州安平縣真府靈應真君廟碑記

道京師而北三萬家之邑今獨深之安平而地則定州也異時建國以其號名之美非信近不侯非親子弟不王故鄂千秋定蕭何相國之功司馬孚有純臣高士之操始得受封其不輕畀付人如此宋有天命累聖仁厚之度不欲多官府以擾齊民元豐蠲役之典世守而不敢亂天下之郡縣有定數吏有定員日以休息無事終不以昔侯王今令宰輒改置也頃蓋欲以安平為郡又

欲徙深而治此者亦嘗相陰陽之抱負審絡脉之紆蹙
其西不能百里即北嶽常山之麓坡陀湧沒氣象騰擲
而前如鷹擊鵂起既獲而徐落河來萬里塹其東南故
輿潤衍沃薶麥繭絲之饒足瞻四方之求野有樓居行
有衢飲虛市之繁如通都豪右之養如貴室櫟櫨丹堊
之飾蕩搖心目詬謳跼躑之戲闐噓閭巷則雖郡不能
比也夫惟邑之勝宜有喜事者崇成佛祠神居以為城
郭壯麗之觀歲時祈禱庇其耄倪於是有真武靈應真

君祠屋老而庠上雨旁風神逝莫留福不時降故絳守
中大夫王侯之族子鄉貢進士捷顧瞻惴惴欲撤而新
之以告諸鄉人之好善者捷行義自為人信一舉義而
資用足知縣事安陽輩侯瑗與其屬聞而勸相之廼以
大觀庚寅八月丙戌始事迄於政和辛卯三月癸亥而
成靈扉前啓三殿鼎峙屹然其中者以奉真君東則廟
碑之所庠西則為紋甃方池以俟神物之遊又為十二
元神像分侍兩廡是皆前所未有者廟成之日嘉薦始

升雲景徘徊風馬來下惚恍祕怪蛇蟲蜒蟠之物出慕
蕭薌隤祉告休瘥癘不作使君壽考民用飲食而提之
意更欲論著本末圖厥永久惟邑童子暗記默識能知
鄔子藉稻之說今乃更從旁近求文不亦左乎然某宦
游經過偕諸人至祠下屢矣邑又近吾州是可不辭謹
按道家者說神乃北方之將玉帝之佐嘗降於龍漢之
年披髮按劍足躡龜蛇世又云即莊周所謂禺強得之
以立北極者昔人說周之書固曰水神初未經見夫道

至於神神至於帝則天地之運禍福之應且將詔之其
精明超忽與維斗日月並為長久而陟降監觀出入於
人間者理所宜有周之言借曰寓而龍漢之記渠敢不
信謹拜稽首銘曰 帝乘倒景遊八方衆真衛翊騫龍
翔日君月妃儼侍旁抽關闔闔趾扶桑旬始滅跡攬槍
藏三山出雲蔚相望九瀛如杯波不揚停輶弭節一笑
相忽然腥風觸天香却視濁世流血滂帝頽以怒威煌
煌人鬼莫辨誰則殃北方神君握天綱髮垂腰環鬚磔

張寒龜縮殼蛇束僵吸呼雷電下取將中軍金甲縛佩
裳月以三七行無鄉一瞬千載空冥茫我思築祠候神
光吹笙參差鼓節鏜雲物晝晦神相羊我民奠居福穰
穰謠詩送迎神勿忘

瀛州經武堂記

崇寧四年春詔以集賢殿修撰張公帥高陽既見吏士
問民所便及邊政後先已即周覽官寺府庫營屯門渠
凡帥事之所關逮者悉領略之而致思焉補苴罅漏趣

成條維綱舉目張參差適序于是可以有營矣乃論於朝高陽實都總管府簡練訓閱之無所軍政取具臨時士益懈不虔請度僧牒入其進以給營繕此經武堂之所從作也府堂有是名舊矣圯徙無常今丞相來帥時嘗建於甲仗庫軍資庫之間使士卒受所養知所用親以大筆書其額堂雖中壞此榜巋然猶存公既獲請即因故基而崇侈其規稱書法之偉若將使後來不可加者經紀儲度得成屋於胸中乃以六年五月始事為堂

七楹十二架左右置挾因二庫為東西序南直射棚作
門以便出入北盡城築亭疏池種所宜草木以為游集
棲息之所堂之中極空地丈衡從俱倍之廣庭修廡顯
豁嚴靚九月工告成力出于羨卒費取于好賜高陽之
民纔聞斤斧剥啄之聲而堂既巍然矣是月某日合樂
大饗落之礪旒植植隼龜飛動鉦鼓轟作聲聞郊坰賓
介獻歌工瞽執技將吏裨校以弓矢飲權奇騰蹙之騎
駢白驪駱色奪綺繡耄老稚孺旁州喜事之人觀者如

雲適秋閱諸將士選卒馳射擊刺無虛日而時聘之使
踵武故事過關習射張侯館次及是皆屬于堂惟高陽
道有郡十一負海帶河陂塘沮澤之限號為天塹自景
德罷兵累聖天地之度一視同仁橐戟鞘劍順拊其鄰
而吾民雍容飲食以樂無事生齒之衆不啻百萬籍于
兵聯于保與丁可任者十四五車輦六畜多可賦無
用則已如有所用沛乎其易易矣然由慶厯置帥甲子
適一周文恬武嬉永無譟張顧一堂幾閱人獨丞相增

新于前而公為起廢于後天下之能立事者果可人人而求之歟先是公簽書瀛州判官自任州務詳盡敏齊其後刺部河北屢過之及今出帥邦人既榮公之來又習公之明毅閎朗公亦安其風俗之舊上下相與以無所苟繕城守飭櫓具師律馬政日往來于懷囊篋細碎無遺漏北使過城下見其完壯矍然曰遽如許復有得公治聲者曰嘗為轉運官非耶上乃親御翰墨寵之曰學博行醇機深慮遠訓齊師旅有聞無聲濬治城隍克

臻深固繇繇翼翼綏靖北邊且進顯謨閣待制而久任
之則公之所立豈特見於此堂也哉顧不曰無競維人
四方其訓之夫天下之事果不難立而形勢憑倚之厚
槩不必論至於為者成欲者得則用人莫彊焉故文武
治外之效與宣王所以復古徒得南仲吉甫張仲方叔
叶意嚮事之助後世無如召公之臣則幾何不大壞恭
惟主上親拔公於卿列畀付方面不吝名寵超真法從
蓋與慨然遠想廉頗李牧之為人近不自知其臣者異

矣而公之報稱又每卓偉宏遠如上所指盡用極報有加而無已則夫為者成欲者得將必有大于是也故于堂成并記公際遇之盛蓋有侯云大觀元年三月十五將仕郎充高陽關路安撫都總管司管勾機宜文字王某記

河間旌麾園記

清河公既作經武堂語其屬曰君子之教必因人之所甚欲而寓所不欲焉飲酒而習射故觥撻不駭從禽而

習戰故誓禁不拂凡吾堂之作固不曰資燕喜備游觀而盛服以臨吏士令行如霜不枚而寂是誰與歌舞之哉吾將使人勸趨樂赴聲氣愉怡而視聽不聳則吾堂之事沛乎其易易矣於是即堂背盡城築亭以為游集棲息之所因故水別穿二方池為橋東西跨以達於亭既又仆除頽垣廢堦則高陽臺見於左經武舊堂與水間一亭見於右軒露映發如獻如酢公喜曰吾得之矣乃鐫補凸凹疏塞壅豁指布臺榭之所置及蒔花種木

之所宜口講手畫皆就條理而觀者悅然如記昔游如閱
奇畫遂欲眩丹碧而擷芳菲也既圖具邦人有進者曰
公有德於我舊矣自從事以至為帥不苟於我有邦規
模設張惟久遠是務新堂之作無須於我增勝緊於河
山保惠無虞而瀉澤荒萊復化為麗絕曲折之游歲時
樂胥士女醵會自今茲無窮休且使有事於經武者無
倦公之所寓深矣願無忘公之德某輒推是意而命諸
名民屬於賢淵珠山王於魯季子審其數思舊堂宜名

曰來賢堂慈惠之施我則有本奚取於水河潤九里水
間亭宜曰流潤亭臨人不愧使君壽考高明之崇納此
日月臺宜曰存景臺桃李成蹊松栢後凋種木者誰有
斐君子四時門亭宜曰種德亭杖屨逶迤民樂豈弟其
趣超然一丘一壑中休亭宜曰成趣亭雨露之播有暕
其華健步遠移從衆好耳新堂西亭宜曰繁華亭煖然
似春吾道不斲草木欣榮孰披拂是新堂東亭宜曰惠
風亭從公于堂知樂其樂優哉游哉處女號虎負城亭

宜曰和樂亭雖然天下之事一廢一興默自有數而瀛
之有此適自公始固將以榮公之來故又取杜子美十
年出幕府自可持旌麾語合而名之曰旌麾園而子城
北樓門適園門也邦人更以是說之夫物之不治每出
於樂因循而事須臾樂因循故堂上有不糞者而事須臾
者寧肯執逆旅難俟之木以冀園林之成於數十年後
昔秦襄公始命有園囿之樂詩則美之曰游于北園四
牡既閑而召伯所舍之木人相與囑勿翦勿伐公方收

拾官棄餘成就壯觀以寓政事而訪者舊以地所宜變
氣布種因以習知神農之學勸課其民則與夫樂因循
而事須臾者豈可同日語哉吾見其駟驥甘棠之美將
作于今而傳於後也庶幾名字附以不朽焉

相州右獄壁記

政和二年詔書深惟元豐董正治官之義稽古六職分
建曹掾視地輕重為多寡於是相具曹而不備掾相有
右獄實前司戶參軍所治而獄在州院久廢明年三月

建安黃敦書始至喟然曰曹事惟爾長子將雍容諷議
以伙助爾其敢不專予狂獄之治乃撤舊增庠苴漏達
斲以具涼燠之室權衡脰械如人不失銖兩調護湯沐
飯哺以時仁術既施更復繕完吏舍帑廩垣翰關籥悉
就方畧它日吏朱印章合牘背遽視篆文與事大不類
請於郡求上尚書更鑄印朝論是之獄有印自君始君
又欲論次釐改本末因著前人名氏用意甚美且囑余
記之余惟若昔天下之治官無大小惟上所建立罔不

不享用充底於成今主上超然遠覽純法三代之盛圖
惟四海之大肇嚴本統衆建多士宜我有官君子不命
其承況命之諄諄然哉惟相地大民衆有商賈甲之故
都曹魏高齊之流風已蕩然無餘聖朝重熙人知率德
而郡綱嚴密多出忠獻魏國韓公之舊今太守公實嗣
世德清通簡要能盡下所長顧官於是邦者初無甚難
不可任之責惟塵身從事皆能如君則進有享上之美
退無空餐之媿不亦休乎予故喜道其事以為大不能

為小不屑為者之戒因以自警云黃君元度其先大夫
將使指歷郡守以才力聞晚遂家於相君姿儀頗整初
筮仕丞相見而異之自河間刑掾改此蓋堂選也政和
四年五月二十日北嶽王某記



